

20  
22

ISLA ONLINE  
Noticia Transparente di Gobierno

Diaranson 26 October 2022

Email: [IslaOnline@gobierno.aw](mailto:IslaOnline@gobierno.aw) Tel: 528-4952



Gabinete Wever-Croes //



**OCTOBER**  
LUNA DI CONSCIENTISACION DI  
**CANCER NA PECHO**

ISLA  
ONLINE

Noticia di Gobierno





## **DURANTE REUNION BILATERAL CU MINISTER HOEKSTRA A TRATA E TEMA DI REAPERTURA DI FRONTERA ENTRE ARUBA Y VENEZUELA**

Diaranson a tuma luga reunion bilateral entre Prome Minister Evelyn Wever - Croes y Minister di relacionnan exterior di Hulanda Wopke Hoekstra, den cual a trata temanan di importancia pa Aruba. E reunion aki a tuma luga un dia despues di e reunion na Corsou entre e cuatro paisnan caminda cu a toca temanan en general di Reino cu e demas Premiernan di cada isla.

Prome Minister Wever - Croes a duna di conoce cu Hulanda y Aruba ta riba mesun liña pa locual ta trata e tema di Venezuela. Ademas Prome Minister a remarca cu lo sigui traha pa purba yega na reapertura di e frontera, y pa yega na esey mester haci palabracionnan y condicionnan concreto cu Venezuela. Lo desea pa tin e mesun palabracionnan cu tabatin entre Aruba y Venezuela na 2018, sinembargo aworaki no tin ningun contacto entre autoridadnan di Aruba y Venezuela, pues asina e frontera no por habri.

Ta importante pa Venezuela bin na mesa pa papia di diferente punto manera: e condicionnan necesario y e control cu Venezuela ta bay efectua. Importante ta pa unabes cu habri e frontera e mester ta safe, sigur y responsabel, Prome Minister Wever - Croes enfatisa.

Otro temanan cu a trata den e reunion bilateral ta encera region, e rol di Aruba y con embahadanan di diferente paisnan por yuda den esaki, Prome Minister Wever - Croes a splica. 'Hopi palabracion a wordo haci, y ta mira bek na dos dia di reunion hopi intenso pero sumamente fructifero pa Aruba. E punto di relacion entre Aruba y Hulanda poco poco ta mehorando y ta mire tambe riba e tereno aki,' Premier Wever - Croes a termina bisando.







## MINISTER XIOMARA MADURO A BISHITA E EXPOSICION POP-ART DI ELGIN FLANEGIEN



Recientemente Minister Maduro di Cultura a bishita e exposicion di e artista local Elgin Flanegien. E exposicion titula POP-ART, Past Opposite Present Art, ta su segundo exposicion solo y ta consisti di un coleccion di pintura cu Elgin a haci for di aña 2007 durante su estudio na Hulanda y algun pintura nobo traha na Aruba. Elgin ta disfruta di haci su obranan di arte y no solamente djies un pintura, ta un creatividad cu e ta trece padilanti y hopi bes inspira pa musica.



Na aña 2006 Elgina a inicia su estudio di Arte na Hogeschool voor de Kunsten na Utrecht. Despues di su segundo aña

Elgin a ricibi un Erasmus scholarship pa por sigui studia na Scotland's University of Dundee, na unda Elgin a gradua y obtene su Bachelor of Fine Arts, specialisa den Arte y Medio Digital y ta encanta cu obranan manera Picasso, Damien Hirst y Basquiat. Elgin su pinturanan ta pone enfasis riba arte riba caya, manera graffiti, cultura local y arte contemporaneo.

Minister Maduro a keda encanta y a disfruta di e exposicion presenta pa Elgin Flanegien. Alabes e mandatario ta invita comunidad pa bishita e exposicion di Elgin cu ta den Cas di Cultura te cu dia 11 di november proximo.



Continuacion MINISTER XIOMARA MADURO A BISHITA E EXPOSICION POP-ART...







## MINISTER GEOFFREY WEVER TA INTRODUCI E CONSTELACION NOBO DI E RAAD VAN COMMISSARISSEN DI SETAR N.V.

Diamars 25 di october, Minister di Asuntonan Economico, Comunicacion y Desaroyo Sostenibel, mr. Geoffrey Wever, a introduci e constelacion nobo di e Raad van Commissarissen (RvC) di Setar N.V.

E Raad van Commissarissen di Setar N.V. ta consisti di e siguiente personanan: señor Stephen Daal (President-Commissaris), señor Anthony Croes (Plaatsvervangend voorzitter), señor Giovanni Atencio (Commissaris), señora Carolina Lopez Paz (Commissaris) y señora Iveta van Veen (Commissaris). Director di Setar N.V. señor Roland Croes tambe tabata presente na e introduccion.

E constelacion nobo di Raad van Commissarissen di Setar N.V. ta consisti di profesionalnan cu amplio experiencia. Señor Stephen Daal ta un empresario cu varios aña di experiencia y a fungi 2 biaha como presidente di ATIA. Señor Anthony Croes ta un registeraccountant cu amplio experiencia den e ramo, ta doño di su propio compania di accountant y ta fungi den diferente otro rol den nos comunidad. Señor Giovanni Atencio tin un preparacion academico den business administration y tin un carera amplio den mundo bancario. Señora Carolina Lopez Paz ta un abogado cu 15 aña di experiencia den abogacia y doño di su propio bufete. Señora Iveta van Veen ta actualmente financial manager na Universidad di Aruba y tin background den accountancy y amplio experiencia internacionalmente den e ramo di funcionamiento financiero.

“Mi ta contento di introduci e constelacion nobo di Raad van Commissarissen aki consistiendo di profesionalnan independiente den area di business, accountancy, abogacia y finanzas y ta sigur cu nan lo haci un bon trabou hunto cu directiva di Setar N.V. Mi ta deseanan hopi exito y sabiduria den e trabounan cu tin nan dilanti”, minister Geoffrey Wever.







## **ARUBA TA BAY UNI SU MES NA E "INTERNATIONAL CHILD SEXUAL EXPLOITATION DATABASE" DI INTERPOL**

Durante e congreso di Interpol cu a tuma luga siman pasa na India, Minister di Husticia y Asuntonan Social Sr. Rocco Tjon a trata e tematica di combati abuso di mucha. Combati abuso di mucha ta sumamente importante y ta un prioridad pa Ministerio di Husticia y Asuntonan Social y ta den e "beleidsvoornemens" di 2022 - 2025.

Manera ta conoci, desde inicio, ministerio di Husticia y Asuntonan Social a bin ta traha riba diferente aspectonan pa asina brinda e debido atencion na combati abuso di mucha. Asina por bisa cu a percursa pa bin cu opleiding pa e unidad di Jeugd en Zeden Politie, a percursa pa duna mas training pa e parti di kinder verhoor y a bin cu un kinder verhoor ruimte tambe. A duna training na psicologonan pa asina reenforza e recherchenan na momento cu ta haci e investigacion pa asina entrega un caso mucho mas solido dilanti huez.

Banda di esaki, Dr. Vincent Latour ya caba a inicia cu su estudionan den exterior pa asina pronto comberti den e prome dokter forensico di Aruba, cual tambe lo tin su efecto positivo na momentno di conduci investigacionnan den casonan di abuso di mucha. Tambe por menciona cu desde Augustus a lansa e campaña nacional contra abuso di mucha "Mi Mesun Heroe", cual ta un programa educativo pa nos muchanan, y ta trata diferente tema den cuadro di abuso di mucha den su totalidad.

Esakinan ta algun di e hopi proyectonan cu tin andando pa loke ta e tematica aki, y pa e motibo aki, durante e congreso di interpol e delegacion di Aruba a acorda e mocion y danki na e cooperacion cu tin cu Interpol, dentro di poco Aruba tambe



lo bay forma parti di e "International Child Sexual Exploitation Database" (ICSE). Compartimento di informacion ta esencial, y e ICSE database ta un plataforma global unico, cu ta brinda un colaboracion global estrecho di investigadornan specialisa y dedica na e identificacion di victimanan y ofensornan. ICSE ta integra imagennan, video y tecnologianan di procesamento di "metadata", "case management" y funcionnan di comunicacion. E database aki ta duna investigadornan e oportunidad pa comparti informacion di casonan, coordina accionnan, comparti experticio y aportacion pero tambe conhuntamente adelanta investigacionnan. E ICSE tambe ta actua pa conduci casonan di de-conflicto, pa link investigacionnan paralelo, y pa preveni investigacion di materialnan relata na casonan cu ya a wordo resolvi.

Pues un reunion sumamente positivo, caminda a traves di e laso cu nos tin cu Interpol, Aruba lo bay haya mucho mas asistencia den combati explotacion di mucha na nivelnan nacional y internacional.





## MANDATARIO DI ENSEÑANSA A RICIBI PRESENTACION DI RESULTADONAN DI E INVESTIGACION DI PLUS ACCOUNTANTS

Diabierna ultimo Minister Endy Croes hunto cu su conseheronan a bishita Plus Accountants den cuadro di e “Doorlichting Rapport van het Arubaanse Onderwijsbestel”. Plus Accountants ta trahando riba un di recomendacionnan di rapport unda cu a haci un investigacion, in-ventarisa y ronda di consulta pa cu e parti financiero di DPS na tur e scolnan di DPS.

Den e ultimo reunion Plus Accountants a duna un presentacion preliminar amplio di tur e resultadonan y analisis di e investigacion na Mandatario di Enseñansa. Como tambe a propone pa implementa un estructura profesional y moderno pa DPS. Minister Endy Croes a indica cu e rapport ta wordo finalisa den e simannan nos dilanti pa asina duna un presentacion na Consejo di Minister como tambe na stake-holders y despues mester tuma decision di e rumbo y maneho nobo den un constelacion nobo pa DPS den su totalidad.



## MINISTER ENDY CROES A PRESENCIA DRAG RACING REMOTE CONTROL

Den fin di siman Minister Endy Croes a bishita “The War of Outlaws Shootout” cu a tuma luga den e parking lot di Compleho Deportivo Guillermo Prospero Trinidad na Dakota. Tabata reina un tremendo ambiente unda e fanaticada di autonan “remote control” por a presencia un tremendo competencia.

Concluyendo Minister Endy Croes ta felicita organisado sr. Gino Kock, Barcadera Nights Foundation y tur esnan cu a participa como tambe e boluntarionan pa un evento exitoso.





## Minister Endy Croes:

# SELECCION DI ARUBA DOMINO BOND A SALI PA PUNTA CANA REPUBLICA DOMINICANA

Diadomingo ultimo seleccion di Aruba Domino Bond a sali rumbo Punta Cana, Republica Dominicana, pa participa y competi den un Mundial di Domino. Sra Soraida Boekhoud cu ta Presidente di e directiva, na cabez di e delegacion aki. Minister di Deporte Endy Croes na nan salida na aeropuerto Internacional Reina Beatrix a desea Aruba Domino Bond tur clase di exito den e mundial di Domino. Tambe den e congreso cu ta bai tuma luga ayanan, sra Soraida Boekhoud, Presidente di Aruba Domino Bond lo bai propone pa Aruba lo por bira cede di un mundial na luna di september pa aña 2024. Aruba Domino Bond trahando cu vision y hopi anticipacion, coordinando cu federacionnan y di e forma aki logrando cosnan grandi den deporte pa pais Aruba.

Minister Endy Croes finalizando a desea henter ekipo di Aruba hopi exito den e mundial di Domino na Republica Dominicana.



# MINISTER ENDY CROES TA FELICITA BARRACUDAS ARTISTIC SWIMMING ARUBA CU NAN EXCELENTE PRESENTACION NA COMPETENCIA DI ARTISTIC SWIMMING CCCAN 2022



Diadomingo ultimo Minister Endy Croes a ricibi nos Seleccion di Landamento Sincronisa na nan yegada na Aruba despues di nan excelente presentacion na e competencia di Artistic Swimming CCCAN 2022 cu a tuma luga na Panama City. Barracudas Aruba a logra conquista medaya di brons, plata y oro durante e competencia tanto den solo, duo y ekipo. Como tambe Barracudas Aruba a logra conquista di dos luga overall den e campeonato di Artistic Swimming organisa pa Central American and Caribbean Amateur Swimming Confederation. Mientras nos ekipo di senior a logra clasifica pa e Weganan CAC San Salvador 2023. Tambe den solo Kyra Hoevertsz y e duo consisti di Kyra Hoevertsz y Mikayla Morales a logra nan clasificacion pa San Salvador. Famia y amigonan presente tabata super contento y orguyoso di e prestacion di tur nos



atletanan.

Prome cu nan salida pa Panama, Minister Endy Croes hunto cu famia di atletanan tabatin e honor di presencia na Piscina Olimpico Roly Bislik na Savaneta e shownan tanto den solo, duo y ekipo como tambe e uniform cu nan a competi cu ne na CCCAN 2022. E mandatario di Deporte a expresa cu e tabata un bunita anochi y un bunita presentacion. Minister Endy Croes ta gradici Barracudas Aruba pe invitacion. Concluyendo e mandatario di Deporte ta felicita nos atletanan, danki pa pone Aruba su nomber briya den exterior cu boso excelente presentacion. Boso a demostra cu boso deseo, disciplina, dedicacion y determinacion boso a logra boso meta. Masha pabien nos ta orguyoso di boso!





## **FLOTAS PETROLERAS ECUADOR (FLOPEC) LO CONSIDERA ARUBA COMO NAN HUB PA E REGION CARIBENSE**

**“E biahe pa Ecuador a duna mas resultado di loke mi a spera”**

Durante conferencia di prensa di gobierno, Minister Glenbert Croes a anuncia un otro oportunidad cu a bin pa Aruba durante su biahe pa Ecuador. E mandatario a splica cu den cuadro di cooperacion entre gobierno di Ecuador y gobierno di Aruba a surgi e proposicion pa FLOTAS PETROLERAS ECUADOR (FLOPEC) lo por uza Aruba como nan hub den e region Caribense. Esaki sigur ta un tremendo noticia pa loke ta e uzo di e tankinan, “tank farm” cu tin na Refineria di Aruba (RDA) y pa e actividadnan maritimo den region. E uzo di Aruba como hub tambe lo bay genera placa pa e companianan di logistico cu ta duna servicio na barconan cu ta ancla den e awanan territorial of cu ta haciendo operacionnan den e awanan territorial, ademas di lo brinda oportunidadnan laboral.

Minister Glenbert Croes ta sumamente optimista pa cu e “move” pa convence FLOPEC establece su mes na Aruba y scohe Aruba como “hub” pa nan actividadnan den region. “E biahe pa Ecuador a duna mas resultado di loke mi a spera” Minister Croes a expresa.

Mirando e interes den e diferente proyectonan cu ta bay bin y tur e proposicion cu tin pa Aruba, lo por spera di wak un boost economico grandi pa gobierno, pa San Nicolas, pa e contratistanan, comercio y e pais en general.





# Feliz diaranson!

APESAR DI CAMINDA DIFICIL NOS DILANTI,  
NOS POR, HUNTO NOS POR.  
NOS POR ENGRANDECE NOS PAIS.  
NOS POR FORTALECE NOS PAIS.  
NOS POR SIRBI NOS PAIS.  
Y HUNTO NOS POR HACI NOS PAIS  
FUERTE Y RESILIENTE UN BIAHA MAS.  
TA HUNTO SO NOS POR BRINDA  
OPORTUNIDADNAN NA NOS  
FUTURO GENERACIONNAN.



**20  
22** | AÑA DI  
INVERSION Y  
OPORTUNIDAD